

Nd. 368. Frumvarp til laga [152. mál]

um Sjúkrahúsasjóð og heimild fyrir ríkisstjórnina til þess að setja á stofn talnahappdrætti.

(Lagt fyrir Alþingi á 75. löggjafarþingi, 1956.)

1. gr.

Stofna skal sjóð, er nefnist Sjúkrahúsasjóður.

2. gr.

Til að aðla sjóðnum tekna skal ríkisstjórninni heimilt að setja á stofn nýtt getraunahappdrætti, sem nefnist talnahappdrætti.

3. gr.

Talnahappdrætti skal vera með þeim hætti, að dregnar skulu út mánaðarlega eða sjaldnar 5 tölur úr talnaröðinni 1—100. Dráttur skal fara fram opinberlega í Reykjavík.

Þátttakendur í happdrættinu gizka á, áður en dráttur fer fram, hverjar tölur dragist út í næsta skipti.

Verðlaun skulu veitt, ef gizkað er á 2—5 réttar tölur.

4. gr.

Verðlaun í happdrætti þessu skulu undanþegin hvers konar opinberum gjöldum, öðrum en eignaskatti, á því ári, sem þau eru veitt.

5. gr.

Ráðherra sá, er fer með heilbrigðismál, setur happdrættinu stjórn og ákveður nánar um störf þess með reglugerð, m. a. um þáttlökugjald.

6. gr.

Úr Sjúkrahúsasjóði skal veita styrki til að reisa ný sjúkrahús og á annan hátt til eflingar heilbrigðismálum landsins, eftir ákvörðun heilbrigðismálaráðherra, að fengnum tillögum stjórnar Sjúkrahúsasjóðs og landlæknis.

7. gr.

Ráðherra sá, er fer með heilbrigðismál, skipar stjórn sjóðsins og setur nánari reglur um starfsemi hans.

8. gr.

Lög þessi öðlast þegar gildi.

Athugasemdir við lagafrumvarp þetta.

Samkvæmt sjúkrahúsalögum, nr. 93 31. des. 1953, ber ríkissjóði að greiða ½ hluta byggingarkostnaðar fjórðungssjúkrahúsa, en þar eð áhöld og allur búnaður kostar stórfé, má gera ráð fyrir að framlag ríkissjóðs, ½ af byggingarkostnaði, nemi vart meiru en ½ hlutum raunverulegs stofnkostnaðar.

Nú stendur fyrir dyrum að ráðast í alkkostnaðarsamar sjúkrahúsabyggingar á ýmsum stöðum, m. a. fjórðungssjúkrahús á Suðurlandi.

Enda þótt fjórðungssjúkrahús Suðurlands væri ekki nema með 30—40 sjúkram, eru þó líkur til, að byggingin myndi, miðað við núverandi verðlag, kosta 5—6 milljónir króna.

Undanfarið hefur sá háttur tíðast verið hafður á um byggingu sjúkrahúsa, að þau hafa verið reist í áföngum, eftir því, sem fé hefur verið handbært. Hafa sjúkrahúsin stundum verið árum saman í smíðum. Er óþarf að fjölyrða, hve miklu dýrari og stirðari slíkur framkvæmdaháttur er, en ef unnt er að ljúka byggingunni í einu átaki.

Frumvarp þetta miðar að því að afla fjár til sjúkrahúsabygginga þeirra, sem mest eru aðkallandi nú, með tekjum af nýju getraunahappdrætti, sem ríkisstjórninni yrði heimilt að setja á stofn.

Skal mynda sérstakan sjóð, Sjúkrahúsasjóð, fyrir tekjur talnahappdrættisins, og veita úr honum framlög heilbrigðismálum landsmanna til eflingar.

Happdrættir það, sem um ræðir í frumvarpinu, hefur náð miklum vinsældum erlendis, þar sem það hefur verið reynt.

Happdrættið er með því sniði, að dregnir eru 5 miðar úr 100 miðum, sem tölusettir eru 1—100, venjulega einu sinni í mánuði. Þátttakendur í happdrættinu freista þess að gizka á, áður en dráttur fer fram, hvaða tölur koma upp, næst þegar dregið er. Skal ágizkunin vera skrifleg, á þar til gerðum seðli og greiðist fyrir ákveðið gjald, svipað og hjá íslenzkum getraunum.

Síðan eru verðlaun veitt þeim, sem geta upp á 2—5 réttum tölum.

„Lotto“, eins og þessi starfsemi er nefnd í Þýzkalandi, ver helmingi brúttó-tekna í vinninga eða verðlaun, en afganginum er varið til greiðslu rekstrarkostnaðar og síðan hreinum ágóða til ýmissa menningar- og líknarmála.

Ef hver seðill hér kostaði 5 krónur og 10 þúsundir soldust í einum drætti, yrðu brúttó-tekjur kr. 50000.00. Af því væri kr. 25000.00 varið í verðlaun, sem skiptast jafnt í 4 flokka, 1. flokkur 5 réttar tölur, 2. flokkur 4 réttar, 3. flokkur 3 réttar og 4. flokkur 2 réttar tölur.

Nú eru minni likur til, að menn fái 1. eða 2. flokks verðlaun en 3. og 4., og skiptast því verðlaunin í lægri flokkunum að jafnaði milli fleiri þátttakenda og verður því hlutur hvers og eins minni en í 2. eða 1. flokki.

Standa vonir til þess, að ef frumvarp þetta yrði að lögum, væri, ef vel tekst, unnt að koma upp fjórðungssjúkrahúsi Suðurlands og síðan öðrum nauðsynlegum sjúkrahúsum, fyrr en ella.

Enda þótt gert sé ráð fyrir því í frumvarpinu, að tekjum happdrættisins verði aðallega varið til byggingar nýrra sjúkrahúsa, myndi þó athugandi síðar að verja þeim, a. m. k. að nokkru leyti, til að styrkja rekstur þeirra sjúkrahúsa, sem erfitt eiga, eða á annan hátt heilbrigðismálum landsins til framdráttar.